


金光明最勝王經

卷一

百三十六
場一

45134

佛



佛
日
增
輝

皇
圖
聖
寶

佛
龕
輪
常
轉

帝
漸
顯
昌

山城州天安寺法金剛院置

佛
牙
子
一
月
日
重
脩

佛

大唐龍興三藏聖教序

御製

蓋聞蒼蒼者天列星辰而著象茫茫者地奠
川岳以成形仰觀天文既如彼也俯循地理
又若斯焉夫以妙旨幽微名言之路攸絕真
如湛寂性相之義都捐然則發啓心聳濟法
雷之激響獎導迷衆俟覺首以司方故知假
名不壞於常名樂說乃詮於無說至若象外
之象獨稱三界之尊天中之天爰著六通之
聖法王見利孕育於七十二君梵帝乘時牢
籠於萬八千歲周星闕彩言符降誕之微漢
日流祥載叶通神之夢故能威揚沙劫化被

場

塵區玉毫舒耀而除昏金口弘宣而遣滯破
煩惱之賊詎藉干戈壞生死之軍惟憑慧力
闢圓明之界廣納於無邊開常樂之門普該
於有識縱使浮天欲浪境風息而俄澄漲日
情塵法雨露而便廊歸依者銷殃而致福迴
向者去危而獲安可謂巍巍乎其有功蕩蕩
乎而無能名者矣但四生蠢蠢未悟無常六
趣悠悠俱纏有結詎知空花不實水月非堅
馳逐於五陰之中播遷於三界之域納諸品
彙終俟法門自白馬西來玄言東被
世尊則隨類敷演衆生乃逐性開迷馬鳴擅
美於瓊編龍樹騰芳於寶偈於是遙通震旦

遠布閭浮半滿之教區分大小之乘並鶩澄
安俊德接武於勝場琳遠高人駢蹤於法宇
遂使微言著範歷千古而暢英聲至蹟涑規
周十方而騰茂實頌屬後周膺運大扇魔風
遂使天下招提咸從毀廢寰中法侶並混編
毗嗟乎閭寂禪居空留宴坐之處荒涼慧苑
無復經行之蹤爰洎開皇重將修建旋逢大
業又遇分崩鬼哭神吟山鳴海沸旣遭塗炭
寧有伽藍正法消淪邪見增長於是人迷覺
路遭迴於苦集之區俗蔽真宗羈絆於蓋纏
之內
我大唐之天下也上凌巢燧俯視羲軒三聖

重光萬邦一統威加有截澤被無垠掩坤絡
以還淳亘軋維而獻欵再懸佛日重補梵天
龍宮將八柱齊安鷲嶺共五峯爭峻大弘釋
教諒屬皇朝者焉大福先寺翻經三藏法師
義淨者范陽人也俗姓張氏五代相韓之後
三台仕晉之前朱紫分輝貂蟬合彩高祖爲
東齊郡守仁風逐扇甘雨隨車化闡六條政
行十部爰祖及父俱馱俗榮放曠一丘逍遙
三徑含和體素養性恬神摘芝秀於東山挹
清流於南澗可謂尋幽丹嶠棲偃白雲臯鶴
於是吞聲塲駒以之繫影法師幼挺明晤夙
彰聰敏纔踰辯李之歲心樂出家甫過遊洛

之年志尋西國業該經史學洞古今惣三藏
之玄樞明一乘之奧義既而閑居習靜息慮
安禪托彼山林遠茲塵累三十有七方遂雅
懷以咸亨二年行至廣府發蹤結契數乃十
人鼓棹昇航惟存一已巡南溟以遐逝拍西
域以長駟歷巖岫之千重凌波濤之萬里漸

屆天竺次至王城

佛說法華靈峯尚在如來成道聖躅仍留吠
舍城中獻蓋之跡不泯給孤園內布金之地
猶存三道寶階居然目覩八大靈塔邈矣親
觀所經三十餘國凡經二十餘載菩提樹下
屢攀折以淹留阿耨池邊幾濯纓而澡鑒法

師慈悲作室忍辱爲衣長齋則一食自資長
坐則六時無倦又古來翻譯之者莫不先出
梵文後資漢譯踈詞方憑於學者銓義別稟
於僧徒今茲法師不如是矣旣閑五天竺語
又詳二諦幽宗譯義綴文咸由於已出指詞
定理匪假於傍求超漢代之摩騰跨秦年之
羅什所將梵本經僅四百部合五十萬頌金
剛座眞容一鋪舍利三百粒以證聖元年夏
五月方屆都焉

則天大聖皇帝出震膺期乘軋握紀紹隆
爲務弘濟爲心爰命百寮兼整四衆虹幡慧
日鳳吹遏雲香散六銖花飄五色鏘鏘濟濟

煒煒煌煌迎于上東之門置于授記之寺共
于闐三藏及大福先寺寺主沙門復禮西崇
福寺主法藏等翻華嚴經後至大福先寺與
天竺三藏寶思末多及授記寺主惠表沙門
勝莊慈訓等譯根本部律其大德等莫不
四禪疑慮六度冥懷懸法鏡於心臺即戒
珠於性海詞林挺秀將覺樹而蓮芳慧炬
揚輝澄桂輪而合影渾金璞玉諒屬其人誠
梵宇之棟梁寔法門之龍象已翻諸雜經律
二百餘卷繕寫云畢尋並進內其餘戒律諸
論方俟後詮五篇之教具名八法之因備曉
鵝珠尚護蟲命無傷浮囊必取於不虧油鉢

終期於靡覆崇聖教之綱紀啓含生之耳目
伏願上資先聖長隆七廟之基下逮微窮恒
佐九天之命遷懷生於壽域致薄俗於淳源
歲稔時和遠安迺肅顧以萬機務惣四海事
殷爰憑乙夜餘式贊弥天之德課虛扣寂聊
題序云

金光明最勝王經卷第一

場

唐三藏法師

義淨奉

制譯

序品第一

如是我聞一時薄伽梵在王舍城鷲峯山頂
於最清淨甚深法界諸佛之境如來所居與
大苾芻衆九萬八千人皆是阿羅漢能善調

伏如大象王諸漏已除無復煩惱心善解脫
慧善解脫所作已畢捨諸重擔逮得已利盡
諸有結得大自在任清淨戒善巧方便智慧
莊嚴證八解脫已到彼岸其名曰具壽阿若
憍陳如具壽阿說侍多具壽婆濕波具壽摩
訶那具壽婆帝利迦大迦葉波優樓頻螺迦
葉伽耶迦葉那提迦葉舍利子大目犍連唯
阿難陀住於學地如是等諸大聲聞各於晡
時從定而起往詣佛所頂禮佛足右繞三匝
退坐一面

復有菩薩摩訶薩百千萬億人俱有大威德
如大龍王名稱普聞衆所知識施戒清淨常

樂奉持忍行精勤經無量劫超諸靜慮繫念
現前開闡慧門善修方便自在遊戲微妙神
通逮得揔持辯才無盡斷諸煩惱累染皆云
不久當成一切種智降魔軍衆而擊法鼓制
諸外道今起淨心轉妙法輪度人天衆十方
佛土悉已莊嚴六趣有情無不蒙益成就大
智具足大忍住大慈悲心有大堅固力歷事
諸佛不般涅槃發弘誓心盡未來際廣於佛
所深種淨因於三世法悟無生忍逾於二乘
所行境界以大善巧化世間於大師教能敷
演秘密之法甚深空性皆已了知無復疑惑
其名曰無障礙轉法輪菩薩常發心轉法輪

菩薩常精進菩薩不休息菩薩慈氏菩薩妙
吉祥菩薩觀自在菩薩捨持自在王菩薩大
辯莊嚴王菩薩妙高山王菩薩大海深王菩
薩寶幢菩薩大寶幢菩薩地藏菩薩虛空藏
菩薩寶手自在菩薩金剛手菩薩歡喜力菩
薩大法力菩薩大莊嚴光菩薩大金光莊嚴
菩薩淨戒菩薩常定菩薩極清淨慧菩薩堅
固精進菩薩心如虛空菩薩不斷大願菩薩
施藥菩薩療諸煩惱病菩薩醫王菩薩歡喜
高王菩薩得上授記菩薩大雲淨光菩薩大
雲持法菩薩大雲名稱喜樂菩薩大雲現無
邊稱菩薩大雲師子吼菩薩大雲牛王吼菩

薩大雲吉祥菩薩大雲寶德菩薩大雲日蔽
菩薩大雲月蔽菩薩大雲星光菩薩大雲火
光菩薩大雲電光菩薩大雲雷音菩薩大雲
慧雨充遍菩薩大雲清淨雨王菩薩大雲華
樹王菩薩大雲青蓮華香菩薩大雲寶栴檀
香清涼身菩薩大雲除闇菩薩大雲破翳菩
薩如是等無量大菩薩衆各於晡時從定而
起往詣佛所頂禮佛足右繞三匝退坐一面
復有梨車毗童子五億八千其名曰師子光
童子師子慧童子法授童子因陀羅授童子
大光童子大猛童子佛護童子法護童子僧
護童子金剛護童子虛空護童子虛空吼童

子寶藏童子吉祥妙藏童子如是等人而爲
上首悉皆安住無上菩提於大乘中深信歡
喜各於晡時往詣佛所頂禮佛足右繞三帀
退坐一面復有四萬二千天子其名曰喜見
天子喜悅天子日炁天子月慧天子明慧天
子虛空淨慧天子除煩惱天子吉祥天子如
是等天子而爲上首皆發弘願護持大乘紹
隆正法能使不絕各於晡時往詣佛所頂禮
佛足右繞三帀退坐一面復有二萬八千龍
王蓮華龍王警羅葉龍王大力龍王大吼龍
王小波龍王持駛水龍王金面龍王如意龍
王如是等龍王而爲上首於大乘法常樂受

持發深信心稱揚擁護各於晡時往詣佛所
頂禮佛足右繞三帀退坐一面復有三萬六
千諸藥義衆毗沙門天王而為上首其名曰
菴婆藥義持菴婆藥義蓮華光藏藥義蓮華
面藥義嚙眉藥義現大怖藥義動地藥義吞
食藥義是等藥義悉皆愛樂如來正法深心
護持不生疲懈各於晡時往詣佛所頂禮佛
足右繞三帀退坐一面復有四萬九千揭路
荼王香象勢力王而為上首及餘健闍婆阿
蘇羅緊那羅莫呼洛伽等山林河海一切神
仙并諸大國所有王衆中宮后妃淨信男女
人天大衆悉皆雲集咸願擁護無上大乘讀

誦受持書寫流布各於晡時往詣佛所頂禮
佛足右繞三匝退坐一面如是等聲聞菩薩
人天大眾龍神八部既雲集已各各至心合
掌恭敬瞻仰尊容目未曾捨願樂欲聞殊勝
妙法尔時薄伽梵於日晡時從定而起觀察
大眾而說頌曰

金光明妙法	最勝諸經王	甚深難得聞
諸佛之境界	我當為大眾	宣說如是經
并四方四佛	威神共加護	東方阿閼尊
南方寶相佛	西方無量壽	北方天鼓音
我復演妙法	吉祥懺中勝	能滅一切罪
淨除諸惡業	及消眾苦患	常與無量樂

一切智根本 諸功德莊嚴 衆生身不具
壽命將損減 諸惡相現前 天神皆捨離
親友懷瞋恨 眷屬悉分離 彼此共乖違
珍財皆散失 惡星為變怪 或被邪蠱侵
若復多憂愁 衆苦之所逼 睡眠見惡夢
因此生煩惱 是人當澡浴 應著鮮潔衣
於此妙經王 甚深佛所讚 專注心無亂
讀誦聽受持 由此經威力 能離諸災橫
及餘衆苦難 無不皆除滅 護世四王衆
及大臣眷屬 無量諸藥義 一心皆擁衛
大辯才天女 及連河水神 訶利底母神
堅牢地神衆 梵王帝釋王 龍王緊那羅

及金翅鳥王

阿蘇羅天衆

如是天神等

并將其眷屬

皆來護是人

晝夜常不離

我當說是經

甚深佛行處

諸佛秘密教

千萬劫難逢

若有聞是經

能為他演說

若心生隨喜

或設於供養

如是諸人等

當於無量劫

常為諸天人

龍神所恭敬

此福聚無量

數過於恒沙

讀誦是經者

當獲斯功德

亦為十方尊

深行諸菩薩

擁護持經者

令離諸苦難

供養是經者

如前澡浴身

飲食及香華

恒起慈悲意

若欲聽是經

令心淨無垢

常生歡喜念

能長諸功德

若以尊重心

聽聞是經者

若生於人趣 遠離諸苦難 彼人善根熟
諸佛之所讚 方得聞是經 及以懺悔法

金光明最勝王經如來壽量品第二

爾時王舍大城有一菩薩摩訶薩名曰妙幢
已於過去無量俱胝那庾多百千佛所承事
供養殖諸善根是時妙幢菩薩獨於靜處作

是思惟以何因緣釋迦牟尼如來壽命短促
唯八十年復作是念如佛所說有二因緣得
壽命長云何為二一者不害生命二者施他
飲食然釋迦牟尼如來曾於無量百千萬億
無數大劫不害生命行十善道常以飲食惠
施一切飢餓衆生乃至已身血肉骨髓亦持

施與令得飽滿。況餘飲食時，彼菩薩於世尊所作是念時，以佛威力，其室忽然廣博嚴淨。帝青琉璃種種衆寶雜彩間飾，如佛淨土有妙香氣過諸天香，分馥充滿於其四面。各有上妙師子之座，四寶所成，以天寶衣而敷其上。復於此座有妙蓮華種種珍寶，以爲嚴飾。量等如來自然顯現於蓮華上，有四如來東方不動南方寶相西無量壽北天鼓音是四如來。各於其座加趺而坐，放大光明周徧照曜。王舍大城及此三千大千世界乃至十方恒河沙等諸佛國土，雨諸天華奏諸天樂。此時於此瞻部洲中及三千大千世界所有衆

生以佛威力受勝妙樂無有乏少若身不具
皆蒙具足盲者能視聾者得聞瘖者能言愚
者得智若心亂者得本心若無衣者得衣服
被惡賤者人所敬有垢穢者身清潔於此世
間所有利益未曾有事悉皆顯現尔時妙幢
菩薩見四如來及希有事歡喜踊躍合掌一
心瞻仰諸佛殊勝之相亦復思惟釋迦牟尼
如來無量功德唯於壽命生疑惑心云何如
來功德無量壽命短促唯八十年尔時四佛
告妙幢菩薩言善男子汝今不應思忖如來
壽命長短何以故善男子我等不見諸天世
間梵魔沙門婆羅門等人及非人有能筭知

佛之壽量知其齊限唯除無上正徧知者時
四如來欲說釋迦牟尼佛所有壽量以佛威
力欲色界天諸龍鬼神健闍婆阿蘇羅揭路
荼緊那羅莫呼洛伽及無量百千億那庾多
菩薩摩訶薩悉來集會入妙幢菩薩淨妙室
中亦時四佛於大衆中欲顯釋迦牟尼如來
所有壽量而說頌曰
一切諸海水 可知其滴數 無有能數知
釋迦之壽量 析諸妙高山 如芥可知數
無有能數知 釋迦之壽量 一切大地土
可知其塵數 無有能筭知 釋迦之壽量
假使量虛空 可得盡邊際 無有能度知

釋迦之壽量。若人住億劫。盡力常算數。亦復不能知。世尊之壽量。不害眾生命。及施於飲食。由斯二種因。得壽命長遠。是故大覺尊。壽命難知數。如劫無邊際。壽量亦如是。妙幢汝當知。不應起疑惑。最勝壽無量。莫能知數者。

今時妙幢菩薩聞四如來說釋迦牟尼佛壽量無限。白言世尊云何如來示現如是短促。壽量時四世尊告妙幢菩薩言善男子。彼釋迦牟尼佛於五濁世出現之時。人壽百年。稟性下劣。善根微薄。復無信解。此諸眾生多有我見。人見眾生壽者。養育邪見。我我所見。斷

常見等為欲利益此諸異生及眾外道如是等類令生正解速得成就無上菩提是故釋迦牟尼如來示現如是短促壽命善男子然彼如來欲令眾生見涅槃已生難遭想憂苦等想於佛世尊所說經教速當受持讀誦通利為人解說不生謗毀是故如來現斯短壽

何以故彼諸眾生若見如來不般涅槃不生恭敬難遭之想如來所說甚深經典亦不受持讀誦通利為人宣說所以者何以常見佛不尊重故善男子譬如有見其父母多有財產珍寶豐盈便於財物不生希有難遭之想所以者何於父財物生常想故善男子彼

諸衆生亦復如是。若見如來不入涅槃不生
希有難遭之想。所以者何。由常見故。善男子。
譬如有人。父母貧窮。資財乏少。然彼貧人或
詣王家。或大臣舍。見其倉庫種種珍財。悉皆
盈滿。生希有心。難遭之想。時彼貧人。爲欲求
財。廣設方便。策勤無怠。所以者何。爲捨貧窮
受安樂故。善男子。彼諸衆生亦復如是。若見
如來入於涅槃。生難遭想。乃至憂苦等想。復
作是念。於無量劫。諸佛如來出現於世。如烏
曇跋華時。乃一現。彼諸衆生發希有心。起難
遭想。若遇如來。心生敬信。聞說正法。生實語
想。所有經典悉皆受持。不生毀謗。善男子。以

是因緣彼佛世尊不久住世速入涅槃善男子是諸如來以如是等善巧方便成就衆生
尔時四佛說是語已忽然不現

尔時妙幢菩薩摩訶薩與無量百千菩薩及
無量億那庾多百千衆生俱共往詣鷲峯山
中釋迦牟尼如來正徧知所頂禮佛足在一
面立時妙幢菩薩以如上事具白世尊時四
如來亦詣鷲峯至釋迦牟尼佛所各隨本方
就座而坐告侍者菩薩言善男子汝今可詣
釋迦牟尼佛所爲我致問少病少惱起居輕
利安樂行不復作是言善哉善哉釋迦牟尼
如來今可演說金光明經甚深法要爲欲饒

益一切衆生除去飢饉令得安樂我當隨喜
時彼侍者各詣釋迦牟尼佛所頂禮雙足却
住一面俱白佛言彼天人師致問無量少病
少惱起居輕利安樂行不復作是言善哉善
哉釋迦牟尼如來今可演說金光明經甚深
法要爲欲利益一切衆生除去飢饉令得安
樂尔時釋迦牟尼如來應正等覺告彼侍者
諸菩薩言善哉善哉彼四如來乃能爲諸衆
生饒益安樂勸請於我宣揚正法尔時世尊
而說頌曰

我常在鷲山

宣說此經寶

成就衆生故

示現般涅槃

凡夫起邪見

不信我所說

為成就彼故。示現般涅槃。

時大會中有婆羅門姓憍陳如名曰法師授記與無量百千婆羅門眾供養佛已聞世尊說入般涅槃涕淚交流前禮佛足白言世尊若實如來於諸眾生有大慈悲憐愍利益今得安樂猶如父母餘無等者能與世間作歸依處如淨滿月以大智慧能為照明如日初出普觀眾生愛無偏黨如羅怛羅唯願世尊施我一願亦時世尊默然而止佛威力故於此眾中有梨車毗童子名一切眾生喜見語婆羅門憍陳如言大婆羅門汝今從佛欲乞何願我能與汝婆羅門言童子我欲供養無

上世尊今從如來求請舍利如芥子許何以
故我曾聞說若善男子善女人得佛舍利如
芥子許恭敬供養是人當生三十三天而為
帝釋是時童子語婆羅門曰若欲願生三十
三天受勝報者應當至心聽是金光明最勝
王經於諸經中最為殊勝難解難入聲聞獨
覺所不能知此經能生無量無邊福德果報
乃至成辦無上菩提我今為汝略說其事婆
羅門言善哉童子此金光明甚深最上難解
難入聲聞獨覺尚不能知何況我等邊鄙之
人智慧微淺而能解了是故我今求佛舍利
如芥子許持還本處置寶函中恭敬供養命

終之後得為帝釋常受安樂云何汝今不能
為我從明行足求斯一願作是語已尔時童
子即為婆羅門而說頌曰

恒河駛流水

可生白蓮華

黃鳥作白形

黑鳥變為赤

假使瞻部樹

可生多羅果

竭樹羅枝中

能出菴羅葉

斯等希有物

或容可轉變

世尊之舍利

畢竟不可得

假使用龜毛

織成上妙服

寒時可披著

方求佛舍利

假使蚊蚋足

可使成樓觀

堅固不搖動

方求佛舍利

假使水蛭蠱

口中生白齒

長大利如鋒

方求佛舍利

假使持兔角

用成於梯橙

可昇上天宮

方求佛舍利

鼠緣此梯上

除去阿蘇羅

能障空中月

方求佛舍利

若蠅飲酒醉

周行村邑中

廣造於舍宅

方求佛舍利

若使驢唇色

赤如頻婆果

善作於歌舞

方求佛舍利

烏與鵪鶉鳥

同共一處遊

彼此相順從

方求佛舍利

假使波羅葉

可成於傘蓋

能遮於大雨

方求佛舍利

假使大船舶

盛滿諸財寶

能令陸地行

方求佛舍利

假使鷓鴣鳥

以鬚銜香山

隨處任遊行

方求佛舍利

尔時法師授記婆羅門聞此頌已亦以伽他

答一切衆生喜見童子曰

善哉大童子

此衆中吉祥

善巧方便心

得佛無上記

如來大威德

能救護世間

仁可至心聽

我今次第說

諸佛境難思

世間無與等

法身性常住

修行無差別

諸佛體皆同

所說法亦尔

諸佛無作者

亦復本無生

世尊金剛體

權現於化身

是故佛舍利

無如芥子許

佛非血肉身

云何有舍利

方便留身骨

爲益諸衆生

法身是正覺

法界即如來

此是佛真身

亦說如是法

尔時會中三萬二千天子聞說如來壽命長

遠皆發阿耨多羅三藐三菩提心歡喜踊躍

得未曾有異口同音而說頌曰

佛不般涅槃 正法亦不滅 為利衆生故

示現有滅盡 世尊不思議 妙體無異相

為利衆生故 現種種莊嚴

尔時妙幢菩薩親於佛前及四如來并二大

士諸天子所聞說釋迦牟尼如來壽量事已

復從座起合掌恭敬白佛言世尊若實如是

諸佛如來不般涅槃無舍利者云何經中說

有涅槃及佛舍利今諸人天恭敬供養過去

諸佛現有身骨流布於世人天供養得福無

邊今復言無致生疑惑唯願世尊哀愍我等

廣為分別

尔時佛告妙幢菩薩及諸大衆汝等當知云
般涅槃有舍利者是密意說如是之義當一
心聽善男子菩薩摩訶薩如是應知有其十
法能解如來應正等覺真實理趣說有究竟
大般涅槃云何爲十一者諸佛如來究竟斷
盡諸煩惱障所知障故名爲涅槃二者諸佛
如來善能解了有情無性及法無性故名爲
涅槃三者能轉身依及法依故名爲涅槃四
者於諸有情任運休息化因緣故名爲涅槃
五者證得真實無差別相平等法身故名爲
涅槃六者了知生死及以涅槃無二性故名
爲涅槃七者於一切法了其根本證清淨故

名爲涅槃八者於一切法無生無滅善修行
故名爲涅槃九者真如法界實際平等得正
智故名爲涅槃十者於諸法性及涅槃性得
無差別故名爲涅槃是謂十法說有涅槃復
次善男子菩薩摩訶薩如是應知復有十法
能解如來應正等覺真實理趣說有究竟大
般涅槃云何爲十一者一切煩惱以樂欲爲
大從樂欲生諸佛世尊斷樂欲故名爲涅槃
二者以諸如來斷諸樂欲不取一法以不取
故無去無來無所取故名爲涅槃三者以無
去來及無所取是則法身不生不滅無生滅
故名爲涅槃四者此無生滅非言所宣言語

斷故名爲涅槃五者無有我人唯法生滅得
轉依故名爲涅槃六者煩惱隨惑皆是客塵
法性是主無來無去佛了知故名爲涅槃七
者真如是實餘皆虛妄實性體者即是真如
真如性者即是如來名爲涅槃八者實際之
性無有戲論唯獨如來證實際法戲論永斷
名爲涅槃九者無生是實生是虛妄愚癡之
人漂溺生死如來體實無有虛妄名爲涅槃
十者不實之法是從緣生真實之法不從緣
起如來法身體是真實名爲涅槃善男子是
謂十法說有涅槃

復次善男子菩薩摩訶薩如是應知復有十

法能解如來應正等覺真實理趣說有究竟
大般涅槃云何爲十一者如來善知施及施
果無我我所此施及果不正分別永除滅故
名爲涅槃二者如來善知戒及戒果無我我
所此戒及果不正分別永除滅故名爲涅槃
三者如來善知忍及忍果無我我所此忍及
果不正分別永除滅故名爲涅槃四者如來
善知勤及勤果無我我所此勤及果不正分
別永除滅故名爲涅槃五者如來善知定及
定果無我我所此定及果不正分別永除滅
故名爲涅槃六者如來善知慧及慧果無我
我所此慧及果不正分別永除滅故名爲涅

槃七者諸佛如來善能了知一切有情非有情一切諸法皆無性不正分別永除滅故名爲涅槃八者若自愛者便起追求由追求故受衆苦惱諸佛如來除自愛故永絕追求無追求故名爲涅槃九者有爲之法皆有數量無爲法者數量皆除佛離有爲證無爲法無數量故名爲涅槃十者如來了知有情及法體性皆空離空非有空性即是真法身故名爲涅槃善男子是謂十法說有涅槃復次善男子豈唯如來不般涅槃是爲希有復有十種希有之法是如來行云何爲十一者生死過失涅槃寂靜由於生死及以涅槃

證平等故不處流轉不住涅槃於諸有情不生厭背是如來行二者佛於衆生不作是念此諸愚夫行顛倒見爲諸煩惱之所纏迫我今開悟今得解脫然由往昔慈善根力於彼有情隨其根性意樂勝解不起分別任運濟度示教利喜盡未來際無有窮盡是如來行三者佛無是念我今演說十二分教利益有情然由往昔慈善根力於彼有情廣說乃至盡未來際無有窮盡是如來行四者佛無是念我今徃彼城邑聚落王及大臣婆羅門刹帝利薜舍戍達羅等舍從其乞食然由往昔身語意行串習力故任運詣彼爲利益事而

行乞食是如來行五者如來之身無有飢渴
亦無便利羸憊之相雖行乞取而無所食亦
無分別然爲任運利益有情是有食相是如
來行六者佛無是念此諸衆生有上中下隨
彼機性而爲說法然佛卽尊無有分別隨其
器量善應機緣爲彼說法是如來行七者佛
無是念此類有情不恭敬我常於我所出訶
罵言不能與彼共爲言論彼類有情恭敬於
我常於我所共相讚歎我當與彼共爲言說
然而如來起慈悲心平等無二是如來行八
者諸佛如來無有愛憎憍慢貪惜及諸煩惱
然而如來常樂寂靜讚歎少欲離諸諍鬧是

如來行九者如來無有一法不知不善通達
於一切處鏡智現前無有分別然而如來見
彼有情所作事業隨彼意轉方便誘引今得
出離是如來行十者如來若見一分有情得
富盛時不生歡喜見其衰損不起憂感然而
如來見彼有情修習正行無礙大慈自然救
攝若見有情修習邪行無礙大悲自然救攝
是如來行善男子如是當知如來應正等覺
說有如是無邊正行汝等當知是謂涅槃真
實之相或時見有般涅槃者是權方便及留
舍利今諸有情恭敬供養皆是如來慈善根
力若供養者於未來世遠離八難逢值諸佛

遇善知識不失善心福報無邊速當出離不
為生死之所纏縛如是妙行汝等勤修勿為
放逸今時妙幢菩薩聞佛親說不般涅槃及
甚深行合掌恭敬白言我今始知如來大師
不般涅槃及留舍利普益衆生身心踊悅歎
未曾有說是如來壽量品時無量無數無邊
衆生皆發無等等阿耨多羅三藐三菩提心時
四如來忽然不現妙幢菩薩禮佛足已從座
而起還其本處

金光明最勝王經卷第一

場

苾芻

上步結頻必二反下楚俱反
香草也具五德以喻比丘也

晡

必蒲反
申持也

闡昌演 累染係上合作 斲羅斲於

駛水音使疾也 嘖眉音頻正作 疲音皮也 蠱音毒

也逼彼力反 澡浴音早洗 底音底 金翅去聲 俱毒

肱下反 庾多於主 芬馥香氣也 忖七本反 帝反

音滴析先擊反 度知各上徒 稟悲品反 策勤上反 鄙反

曇跋下上 涕淚一上音 怙羅尸土音 邊鄙反

下碑美反 邑也 謁樹上丘 蚊蚋上音 水

蛭下音質 鋒音峯 梯橙下上 蠅反 鵠上音

鵠上音休 不見明夜遊 鷓鴣上音 船音 舶上音

字下音 盛滿上音 鷓鴣上音 船音 察上音

業下音 漂溺上音 薛舍上音 成達上音

又注 串習上音 羸僂上音 疲極下音 言上音

反力
智
誼聞
上兄
下女
孝反
反誘
音感
憂倉
應反



